

四庫全書

史部

欽定四庫全書

史部

明史卷

一百九十
九百

御史臣 李陽樸 覆勘

總校官編修臣 朱 鈐

欽定四庫全書

明史卷一百九十九

大學士張廷玉等奉 敕修

列傳第八十七

李 戢

子惠

王 憲

胡世寧

子純

李承勛

王以旂

范 鏞

王邦瑞

子士國

鄭 曉

李鉞字虔甫祥符人弘治九年進士除御史巡視中城理河東鹽政歷有聲績正德改元天鳴星變偕同官陳數事論中官李興甯謹苗達高鳳等罪而請斥尚書李孟暘都督神英武宗不能用以喪歸劉瑾惡鉞劾其黨假他事罰米五百石輸邊瑾敗起故官出為鞏昌知府尋遷四川副使巡撫林俊委鉞與副使何珊討敗流賊方四等賜金加俸遷陝西按察使擢右僉都御史巡撫山西寇入白羊口鉞度宣大有備必窺岢嵐五臺間乃亟畫戰守寇果犯岢嵐鉞與延綏援將安國杭雄敗之

加俸一級尋討平內寇武廷章等召入理院事世宗即位歷兵部左右侍郎出總制陝西三邊軍務鉞長軍旅料敵多中初至固原寇入犯援兵未集鉞下令大開諸營門晝夜不閉寇疑有備未敢逼乃礮擊之寇引去以其間增築墩堡謹烽堠廣儲蓄選壯勇為備未幾寇復深入平涼邠州鉞令遊擊時陳周尚文等分伏要害遏其歸斬獲多鉞策寇失利必東犯延綏檄諸將設伏待寇果至又敗去已而言官論邠州失事罪請罷總兵官

劉淮巡撫王珣等並及鉞詔奪淮職責鉞圖後效鉞日
劾乞休不許盜楊錦等剽延綏殺指揮翟相鉞討禽之
嘉靖二年以塞上無警召還給事中劉世揚請留鉞陝
西而久任諸邊巡撫帝卒召鉞進右都御史總督漕運
巡撫鳳陽諸府入掌都察院事四年代金獻民為兵部
尚書兼督團營中官刁永等多所陳乞帝皆許之又錄
司禮扶安家八人官錦衣南京守備已三人復命卜春
添注以往御馬監閻洪因軍政請自考騰驤四衛及收

馬所官鉞累疏力爭帝皆不納至責以抗旨令對狀鉞引罪乃罷武定侯郭勛以會武宴列尚書下疏爭之鉞言中府官之有會武宴猶禮部之有恩榮宴也恩榮禮部為主會武中府為主故皆列諸尚書之次宴圖可徵不得引團營故事帝竟從勛言錦衣革職百戶李全奏乞復任鉞請治其違旨罪帝不問於是官旗鄭彪等皆援全例以請鉞執奏如初而疏有猿攀狐媚語帝惡之復責對狀奪俸一月鉞既屢諫不用失上意且知為近

倖所嫉會病遂再疏乞休許馳驛未行卒贈太子少保
遣官護喪歸葬久之賜謚恭簡子惠正德十二年進士
官行人諫武宗南巡死於廷杖贈監察御史

王憲字維綱東平人弘治三年進士歷知阜平滑二縣
召拜御史正德初擢大理寺丞遷右僉都御史清理甘
肅屯田進右副都御史巡撫遼東歷鄆陽大同以應州
禦寇功廕錦衣世百部遷戶部右侍郎改撫陝西入為
兵部右侍郎近畿盜起偕太監張忠都督朱泰捕之復

以功廕錦衣武宗南征命率戶兵工三部郎各一人督
理軍儲駕旋以中旨代王瓊為兵部尚書世宗即位為
給事中史道劾罷嘉靖四年廷推鄧廷璋及憲為三邊
總制言官持不可帝竟用憲部將王宰史經連敗寇璽
書褒諭濟農數萬騎渡河從石臼墩深入憲督總兵官
鄭卿杭雄趙瑛等分據要害擊之都指揮卜雲斷其歸
路寇至青羊嶺大敗去五日四捷斬首三百餘級獲馬
馳罷仗無算帝大喜加憲太子太保復予一子廕至是

凡三廕錦衣世百戶矣中官織花絨於陝憲請罷之又因九廟成請釋還議禮得罪者頗為士大夫所稱張璉桂萼欲用王瓊為總制乃改憲南京兵部尚書已入為左都御史朔州告急廷推憲總督宣大憲不肯行曰我甫入中臺何見驅亟也給事中夏言趙廷瑞劾憲託疾避難復罷歸未幾帝追念憲召為兵部尚書小王子入寇條上平戎及諸邊防禦事宜又請立京營分伍操練法諸將不得藉內府供事規避營操帝皆嘉納舊制軍

功論敘有生禽斬首當先殿後奇功頭功諸等其後濫冒日多憲定軍功襲替格自永樂至正德酌其輕重大小之差臚析以上詔著之會典為成式尋兼督團營西番諸國來貢稱王號者百餘人憲與禮臣夏言等請如成化弘治間例答敕止國王一人仍限貢期人數議乃定大同兵變憲初言首亂當誅餘宜散遣而大學士張孚敬與總督劉源清力主用兵憲乃不敢堅前議源清攻城不能下北寇又內侵請別遣大臣禦北寇已得專

攻城憲亦議從其奏論者多尤憲會帝悟大同重鎮不宜破壞乃寢其事亂亦旋定源清竟得罪去居數年憲引年歸卒贈少保謚康毅子汝孝副都御史見丁汝夔傳

胡世寧字永清仁和人弘治六年進士性剛直不畏疆禦且知兵除德安推官岐王初就藩從官驕世寧裁之他日復請湖田持不可遷南京刑部主事應詔陳邊備十策復上書極言時政闕失時孝宗已不豫猶領之再

遷郎中與李承勛魏校余祐善時稱南都四君子遷廣西太平知府太平知州李濬數殺掠吏民世寧密檄龍英知州趙元瑤禽之思明叛族黃文昌四世殺知府占三州二十七村副總兵康泰偕世寧入思明執其兄弟三人而泰畏文昌夜遯委世寧空城中危甚諸土酋德世寧發兵援乃得還文昌懼歸所侵地降土官承襲長吏率要賄不時奏以故諸酋怨叛世寧令生子即聞府應世及者年十歲以上朔望謁府父兄有故按籍請官

於朝土官大悅母喪歸服闋赴京道滄州流寇攻城急
世寧即馳入城畫防守計賊攻七日夜不能拔引去再
知寶慶府岷王及鎮守中官王潤皆嚴憚之遷江西副
使與都御史俞諫畫策禽盜討平王浩入以暇城廣昌
南豐新城當是時寧王宸濠驕橫有異志莫敢言世寧
憤甚正德九年三月上疏曰江西之盜勦撫二說相持
臣愚以為無難決也已撫者不誅再叛者毋赦初起者
亟勦如是而已顧江西患非盜賊寧府威日張不逞之

徒羣聚而導以非法上下諸司承奉太過數假火災奪民廛地採辦擾旁郡蹂籍徧窮鄉臣恐良民不安皆起為盜臣下畏禍多懷二心禮樂刑政漸不自朝廷出矣請於都御史俞諫任漢中專委一人或別選公忠大臣鎮撫勅王止治其國毋撓有司以靖亂源銷意外變章下兵部尚書陸完議令諫往計賊情撫勦之宜至所言違制擾民疑出偽托宜令王約束之得旨報可宸濠聞大怒列世寧罪徧賂權幸必殺世寧章下都察院右都

御史李士實宸濠黨也與左都御史石玠等上言世寧
狂率當治命未下宸濠奏復至指世寧為妖言乃命錦
衣官校逮捕世寧世寧已遷福建按察使取道還里宸
濠遂誣世寧逃馳使令浙江巡按潘鵬執送江西鵬盡
繫世寧家人索之急李承勛為按察使保護之世寧乃
亡命抵京師自投錦衣獄獄中三上書言宸濠逆狀卒
不省繫歲餘言官程啟充徐文華蕭鳴鳳邢寰等交章
救楊一清復以危言動錢寧乃謫戍瀋陽居四年宸濠

果反世寧起戍中為湖廣按察使尋擢右僉都御史巡撫四川道聞世宗即位疏以司馬光仁明武三言進因薦魏校何瑋邵銳可講官林俊楊一清劉忠林廷玉可輔弼知府劉蒞徐鈺先為諫官有直聲宜擢用時躋其言松潘所部熟番將吏久不能制率輸貨以假道番殺官軍憚不改詰官軍殺番輒抵罪世寧陳方畧請選將益兵立賞罰格嚴隱匿禁修烽堠時巡徼以振軍威通道路詔悉行之又劾罷副總兵張傑中官趙欽甫兩月

名為吏部右侍郎未上以父憂歸既免喪家居朝廷方
議大禮異議者多得罪世寧意是張璠等疏乞早定追
崇大禮未上語聞京師既有議遷顯陵祔天壽山者世
寧極言不可乃竝前疏上之帝深嘉歎無何聞廷臣伏
闕爭有杖死者馳疏言臣向以仁明武三言進然尤以
仁為本仁生成之德明日月之臨皆不可一日無武則
雷霆之威但可一震而已今廷臣忤旨陛下赫然示威
辱以箠楚體羸弱者輒弊傳之天下書之史冊謂鞭撻

行殿陞刑辱及士夫所以光聖德新進非一言偶合後
難保必當舊德老成一事偶忤後未必皆非望陛下以
三無私之心照臨於上無先存適莫於中帝雖不能從
亦不忤尋名為兵部左侍郎條戍邊時所見險塞利害
二十五事以上又請善保聖躬毋輕餌藥物獻大學秦
誓章洪範惟辟威福繫辭節初爻講義並乞留中給事
中余經遂劾世寧啓告密之漸世寧乞罷不許大禮成
進秩一等復陳用人二十事工匠趙奎等五十四人以

中官請悉授職世寧言賞過濫不納屢疏引疾改南京
吏部就遷工部尚書已復召為左都御史加太子少保
辭宮銜許之世寧故方嚴及掌憲務持大體條上憲綱
十餘條末言近士習忌刻一遭讒毀則終身廢棄食事
彭祺發豪強罪受謗奪官諸如此者宜許大臣申理帝
採其言惟祺報寢執政請禁私謁世寧曰臣官以察為
名人非接其貌聽其言無由悉其才行帝以為然遂弗
禁俄改刑部尚書每重獄別白為帝言之帝輒感悟中

官剛聰誣漕卒掠御服坐二十人世寧劾其妄已聽情得抵罪帝乃益信世寧王瓊修卻陳九疇將致之死以世寧救得戍兵部尚書王時中罷以世寧代加太子太保再辭不得命乃陳兵政十事曰定武畧崇憲職重將權增武備更賞罰馭土夷足邊備絕弊源正謬誤惜人才所言多破常格帝優旨答之土魯番貢使乞歸哈密城易降人伊蘭王瓊上其事世寧言先朝不惜棄大寧交趾何有於哈密況初封忠順為我外藩而自哈商以

來三為土魯番所執遂狎與戎比以疲我中國耗財老
師戎得挾以邀索臣以為此與國初所封元尊和順寧
順安定三王等耳安定在哈密內近甘肅今存亡不可
知我一切不問獨重哈密何也宜專守河西謝絕哈密
伊蘭木庫森衛人反正歸順非納降比彼安得索之唐悉
怛謀事可鑑也張璠等皆主璦議世寧言格不用獨留
伊蘭不遣居兵部三月求去帝不許免朝叅世寧又上
備邊三事固稱疾薦乃聽乘傳歸給廩隸如制歸數月

復起南京兵部尚書固辭不拜九年秋卒贈少保謚端敏世寧風格峻整居官廉疾惡若讐而薦達賢士如不及都御史馬昊陳九疇坐累廢副使施儒楊必進考察被黜御史李潤副使范輅為時所抑連章薦之與人語呐不出口及具疏援据古今洞中窾會與李秋勛善而持議不苟合承勛欲授隴勝官復芒部故地世寧言勝非隴氏子芒氏不當復立始以議禮與張璉桂萼合璉萼德之欲援以自助世寧不肯附會論事多牴牾萼議

欲銷兵世寧力折之昌化伯以他姓子冒封下廷議世寧言吾輩不得以厚賂故誣朝廷萼為色變萼方為吏部而世寧引疾言天變人窮盜賊滋起咎在吏戶兵三部不得人兵部尤重請避賢路又以哈密議語侵璵諸大臣皆忌之帝始終優禮不替子純繼純以父任知肇慶府有才行繼幼不慧不為世寧知世寧在江西出討賊部將入見繼繼為指陣法進退離合甚詳凡三日世寧歸閱大異之知其故嘆曰吾有子不自識何也自是

擊賊輒令繼從與策方略世寧十不失三繼十不失一
世寧方草疏論宸濠繼請曰是且重得禍世寧曰吾已
許國惶恤其他及世寧下獄繼念其父病死

李承勛字立卿嘉魚人父田進士官右副都御史巡撫
順天有操執為政不苛承勛舉弘治六年進士由太湖
知縣遷南京刑部主事歷工部郎中遷南昌知府正德
六年贛州賊犯新淦執叅政趙士賢靖安賊據越王嶺
瑯瑤岸華林賊又陷瑞州諸道兵不敢前承勛督民兵

勦數有功華林賊殺副使周憲憲軍大潰承勛單騎入
憲營衆乃復集都御史陳金即激承勛討之賊黨王奇
聽撫搜得其衷及縱使還奇感泣誓以死報承勛令奇
密入砦說降其黨為內應而親率所部登山奇夜拔柵
官軍奮而前降者自內出賊遂潰已從金斬賊渠羅光
權胡雪二華林賊平鎮守中官黎安誣承勛擅易賊首
王浩入獄詞坐下吏大理卿燕忠即訊得白舉治行卓
異超遷浙江按察使歷陝西河南左右布政使以右副

都御史巡撫遼東邊備久弛開原尤甚士馬纔十二牆
堡墩臺圯殆盡將士依城塹自守城外數百里悉為諸
部射獵地承勛疏請修築會世宗立發帑銀四十餘萬
兩承勛命步將四人各一軍守要害身負畚鍤先士卒
凡為城塹各九萬一千四百餘丈墩堡百八十有一招
逋逃三千二百人開屯田千五百頃又城中固鐵嶺斷
陰山遼河之交城蒲河撫順扼要衝邊防甚固錄功進
秩一等又數陳軍民利病咸報可以疾歸起故官蒞南

院三遷刑部尚書加太子少保帝以京營多弊欲整飭之遂加承勛太子太保改兵部尚書兼左都御史專督團營尋兼掌都察院以疾三疏乞休且言山西潞城賊以四道兵討之不統於一人故無功川貴芒部之役措置乖方再勝再叛宜命伍文定深計毋專用兵豐沛河工二年三易大臣工不就宜令知水利者各陳所見而俾侍郎潘希曾度可否其尤要者在決壅蔽患倣唐宋轉對次對故事不時召見大臣帝不允辭下其議於所

司時秦晉楚蜀歲侵詔免田賦承勛言有司例十月始徵賦今九月矣恐官吏督趣陰圖乾沒宜及其未徵遣官馳告以所蠲數山陬僻壤俾悉戶曉有司不能奉宣德意者罪之撫按失舉奏並坐帝褒納之奏奪京營把總楊清職郭勛為求復語侵承勛承勛因求退給事中王準等劾勛恣乃敕責勛而下清法司兵部尚書胡世寧致仕詔承勛還部代之疏言朝廷有大政及推舉文武大臣必下廷議議者率相顧不發拱手聽宜及未議

前備條所議布告與議者俾先諭其故然後平心商質
各盡所懷議苟不合聽其別奏庶足盡諸臣之見而所
議者公帝然其言下詔申飭尋命兼督團營言官攻張
璉桂萼黨并及承勛承勛連章求退帝復溫旨答之中
官出鎮者率暴橫承勛因諫官李鳳毛等言先後裁二
十七人又革錦衣官五百人監局冒役數千人獨御馬
監未汰復因給事中田秋奏多所裁減而請以騰驤四
衛屬部覈詭冒制可中官言曩彰義門破也先東市勦

曹賊皆四衛功以直內故易集隸兵部不便承勛言彰義門之戰禍由王振東市作賊即曹吉祥也帝卒從承勛議歸兵部寇犯大同議遣大臣督兵衆推都御史王憲憲不肯行給事中夏言謂承勛曰事急公當請行承勛竟不請給事中趙廷瑞並劾之會寇退罷十年春大風晝晦帝憂邊事承勛言去歲冰合敵騎盡入河套延寧固原皆當警備甘肅軍餉專仰河東宜於蘭州糴貯以備緩急曩河西患土魯番今亦不喇又深入兩寇

雲擾孤危益甚套寇出入並經莊浪急宜繕塞設險斷
臂截踵使不得合兀良哈最近京師不善撫卹門庭寇
雲南安鳳之叛軍民困蔽臨安蒙自盜賊復興曠日淹
時恐釀大患交趾世子流寓老撾異日歸命請援或據
地求封皆未可測惟急用人理財俾邊鄙無虞帝嘉納
焉承勛沉毅有大畧帝所信任自輔臣外獨承勛與胡
世寧大事輒咨訪二人亦孜孜奉國知無不言世寧卒
半歲承勛亦卒帝深嗟悼贈少保謚康惠所賚子常典

外特賜白金綵幣米蔬諸物承勛官四十年家無餘貲
其議大禮亦與世寧相合云

王以旂字士招江寧人正德六年進士除上高知縣華
林賊方熾以旂訓鄉兵禦之賊不敢犯徵授御史出按
河南宸濠反鎮守太監劉璟倡議停鄉試以旂言河南
去江西遠罷試無名乃止璟又言帝親征道且出汴牒
取供頓銀四萬兩巡撫議予之以旂執不予世宗即位
欲加興獻帝皇號以旂抗言不可已上弭災要務言司

禮取中旨免張漢職科臣不預聞此啟矯偽之漸也帝
不聽累遷兵部右侍郎徐呂二洪竭漕舟膠命兼右僉
都御史總理河漕踰年渠水通進秩一等尋拜南京右
都御史召為工部尚書改左都御史代陳經為兵部尚
書兼督團營三邊總督曾銑議復河套大學士夏言主
之數下優旨獎銑令以旂集廷臣議以旂等力主銑議
議上帝意忽變嚴旨咎銑令再議以旂等惶恐盡反前
說帝逮銑令以旂代之套寇自西海還肆掠永昌鎮羌

總兵官王繼祖禦却之已復來犯并及鎮番山丹部將
蔡勲馬宗援三戰皆捷前後斬首一百四十餘級論功
廕以旂一子已而寇數萬復屯寧夏塞外將大入官軍
擊之斬首六十餘級寇宵遁延綏寧夏開馬市二鎮市
五千匹其長朗台吉等約束所部終市無譁以旂以聞
詔大賚二鎮文武將吏以旂復賜金幣錄延綏將士破
敵功再廕一子在鎮六年修延綏城堡四千五百餘所
又築蘭州邊垣加官至太子太保比卒軍民為罷市贈

少保謚襄敏再予一子官

范鏞字平甫其先江西樂平人遷瀋陽鏞登正德十二年進士授工部主事遷員外郎嘉靖三年伏闕爭大禮下獄廷杖由戶部郎中改長蘆鹽運司同知遷河南知府歲大饑巡撫都御史潘壻駁諸請振文牒候勘實乃發鏞不待報輒開倉振之全活十餘萬民爭謳頌鏞語聞禁中帝為責戶部及壻與巡按御史匿災狀壻歸罪鏞以自解被劾罷去鏞名由此顯遷兩淮鹽運使條上

巖政十要歷四川叅政湖廣按察使浙江河南左右布政使二十年擢右副都御史巡撫寧夏總為人持重有方略既涖重鎮不上首功一意練步騎廣儲蓄繕治關隘亭障寇為遠徙俘歸者五百人上疏言邊將各有常祿無給田之制自武定侯郭勛奏以軍餘開墾田園給將領委奸軍為莊頭害殊大宜給還軍民任耕種便帝從其請居數年引疾歸起故官撫河南尋召為兵部右侍郎轉左尚書王以旂出督三邊總署部事項之奉給

總理邊關阨隘奏上經略潮河川居庸關諸處事宜請
於古道門外蜂窩嶺增墩臺一為外屏濬濠設橋以防
衝突川西南兩山對處各設敵臺以控中流分戍兵番
直守要害又薊鎮五里垛划車并連口慕田峪等地宜
設墩臺惡谷紅土谷香鑪石等地宜斬崖塹居庸關外
諸口在宣府為內地在居庸則為邊藩宜敕東中路文
武臣修築加潮河川提督為守備增副將居庸關領天
壽山黃花鎮設橫嶺守備塞壞來路增置新軍二千餘

人資團練又議紫荆倒馬龍泉等關及山海關古北口
經略事宜請於紫荆之桑谷倒馬之中窰關峪龍泉之
陡石嶺諸要害創築城垣增設敵樓營舍薊州所轄燕
河太平馬蘭密雲四路修築未竟者括諸司贖鍰竣之
而浮圖峪插箭嶺尤為紫荆倒馬二關衝移叅將分駐
石門杜家莊俾保定總兵駐紫荆薊遼懸絕千里移建
昌營遊擊於山海關三屯等營缺軍應速募馬不足者
補入其常戍之兵介胄不備量給鎧仗番上者悉予行

糧毋俾荷戈枵腹又言諸路緩急以密雲之分守為最
各關要害以密雲之迤西為最若燕河之冷口馬蘭之
黃崖太平之榆木嶺擦崖子皆所急也宜敕撫鎮督諸
將領分各營士馬兼側近按伏之兵迭為戰守兵部言
軍戍久戀土狎移置恐他變莫若山海關增置能將一
員募軍三千屯駐聽薊遼撫臣調度援燕河餘如總言
下守臣議帝才總甚會兵部尚書趙廷瑞罷即命總入
代總以老辭且言隨事通變之將順之宜帝怒責總不

恭削其籍時嚴嵩當國而鋤本由徐階薦天下推為長者惜其去不以罪然鋤罷帝召翁萬達甫至以憂去丁汝夔代之明年諳達逼都城汝夔遂誅死而鋤歸久之乃卒隆慶元年復官

王邦瑞字維賢宜陽人早有器識為諸生山東盜起上勦寇十四策於知府正德十二年成進士改庶吉士與王府有連出為廣德知州嘉靖初祖憂去補滁州屢遷南京吏部郎中出為陝西提學僉事坐歲貢不中式五

名以上貶濱州知州再遷固原兵備副使涇邠巨盜李
孟春流劫河東西勤平之以祖母憂去服除復提學陝
西轉叅政母憂解職起擢右僉都御史巡撫寧夏寇乘
冰入犯設伏敗之改南京大理卿未上召為兵部右侍
郎改吏部進左諳達犯都城命邦瑞總督九門邦瑞屯
禁軍郭外以巡捕軍營東西長安街大啟郭門納四郊
避寇者兵部尚書丁汝夔下獄命邦瑞攝其事兼督團
營寇退請治諸將功罪且濬九門濠塹皆報可邦瑞見

營制久弛極陳其弊遂罷十二團營悉歸三大營以咸寧侯仇鸞統之邦瑞亦改兵部左侍郎專督營務復條上興革六事中言宦官典兵古今大患請盡撤提督監槍者帝報從之又舉前編修趙時春工部主事申飏知兵並改兵部分理京營事未幾帝召兵部尚書翁萬達未至遲之遂命邦瑞代條上安攘十二事仇鸞構邦瑞於帝帝眷漸移會鸞奏革薊州總兵官李鳳鳴大同總兵官徐珏任而薦京營副將成勲代鳳鳴密雲副將徐

仁代珏旨從中下邦瑞言朝廷易置將帥必采之公卿
斷自宸衷所以慎防杜漸示臣下不敢專也且京營大
將與列鎮將不相統攝何緣京營乃黜陟各鎮今曲徇
鸞請臣恐九邊將帥悉奔走托附非國之福也帝不悅
下旨譙讓鸞又欲節制邊將罷築薊鎮邊垣邦瑞皆以
為不可鸞大憾益肆譏搆會邦瑞復陳安攘大計遂嚴
旨落職以冠帶辦事居數日大計自陳竟除名以趙錦
代邦瑞去鸞益橫明年誅死錦亦坐黨比遣戍於是帝

漸思之踰十年京營缺人帝曰非邦瑞不可乃起故官
既至疏便宜數事悉允行踰年卒贈太子少保謚襄毅
遣行人護喪歸葬邦瑞嚴毅有識量歷官四十年以廉
節著子正國南京刑部侍郎

鄭曉字室甫海鹽人嘉靖元年舉鄉試第一明年成進
士授職方主事日披故牘盡知天下阨塞士馬虛實強
弱之數尚書金獻民屬撰九邊圖志人爭傳寫之以爭
大禮廷杖大同兵變上疏極言不可赦張孚敬柄政罷

之欲改寘翰林及言路曉皆不應父憂歸久之不起許
讚為吏部尚書調之吏部歷考功郎中夏言罷相帝惡
言官不糾劾詔考察去留大學士嚴嵩因欲去所不悅
者而曉去喬佑等十三人多嵩所厚嵩大憾曉調文選
嵩欲用趙文華為考功曉言于讚曰昔黃禎為文選調
李開先考功皆山東人詔不許今調文華曉避位而已
讚以謝嵩嵩欲以子世蕃為尚寶丞曉曰治中遷知府
例也遷尚寶丞無故事嵩益怒以推謫降官周鈇等貶

曉和州同知稍遷太僕丞歷南京太常卿召拜刑部右侍郎俄改兵部兼副都御史總督漕運大江南北罹倭患漕艘幾阻曉請發帑金數十萬造戰舸築城堡練兵將積芻糗詔從之中國奸民利倭賄多與通通州人顧表者尤桀黠為倭導以故營砦皆據要害盡知官兵虛實曉懸重賞捕戮之募鹽徒驍悍者為兵增設泰州海防副使築瓜洲城廟灣麻洋雲涕諸海口皆增兵設墩遂破倭於通州連敗之如臯海門襲其軍呂泗圍之狼

山前後斬首九百餘賊潰去錄功再增秩三賚銀幣時賊多中國人曉言武健才諳之徒困無所逞甘心作賊非國家廣行網羅使有出身之階恐有如孫恩盧循輩出乎其間禍滋大矣洪武時倭寇近海州縣以高皇帝威靈兼謀臣宿將築城練兵經略數年猶未乂安乃招漁丁島人鹽徒蠶戶籍為水軍至數萬人又遣使出海宣布威德久之倭始不為患今江北雖平而風帆出沒倏忽千里倭恃華人為耳目華人借倭為爪牙非詳為

區畫後患未易弭也帝頗採納之尋召為吏部左侍郎遷南京吏部尚書帝以曉知兵改右都御史協理戎政尋拜刑部尚書諳達圍大同右衛急帝命兵部尚書楊博往督大師乃以曉攝兵部曉言今兵事方棘而所簡聽征京軍三萬五千人乃令執役赴工何以備戰守乞歸之營伍帝立從之尋還視刑部事嚴嵩勢益熾曉素不善嵩而其時大獄如總督王忬以失律中允郭希顏以言事曉並予輕比嵩則置重典南都叛卒周山等殺

侍郎黃懋官海寇汪直通倭為亂曉置重典嵩故寬假之惟巡撫阮鶚總督楊順御史路楷以嵩曲庇曉不能盡法議者譏其失出云故事在京軍民訟俱投牒通政司送法司問斷諸司有應鞠者亦叅送法司無自決遣者後諸司不復遵守獄訟紛拏曉奏循故事帝報許於是刑部間捕囚畿府而巡按御史鄭存仁謂訟當自下而上檄州縣法司有追取毋輒發曉聞率侍郎趙大祐傳頤守故事爭存仁亦據律執奏章俱下都察院會刑

科平議議未上曉疏辨嵩激帝怒切讓遂落曉職兩侍郎亦貶二秩曉通經術習國家典故時望蔚然為權貴所扼志不盡行既歸角巾布衣與鄉里父老游處見者不知其貴人也既卒子履淳等訟曉禦倭功於朝詔復職隆慶初贈太子少保謚端簡履淳自有傳

贊曰李鉞諸人皆以威畧幹濟顯於時鉞與王憲王以旂之治軍禮李承勛范鏢之畫邊計才力均有過人者胡世寧奮不顧身首發奸逆危言正色始終一節易稱

王臣蹇蹇世寧近之矣王邦瑞抵抗權倖躋而復起鄭
曉諳悉掌故博洽多聞兼資文武所在著效亦不愧名
臣云

明史卷一百九十九

欽定四庫全書

明史卷一百九十九考證

李鉞傳理河東鹽政

臣

章宗瀛按鉞巡河東時有斷

安邑疑獄及劾鎮守中官二事見獻徵錄傳未載謹

附考

王憲傳召拜御史

臣

章宗瀛按憲為御史時曾巡撫

蘇松諸郡有土豪家暴富置水牢以禁負債者為憲

所發治其罪見明張壁所撰傳記史未之及謹附識

胡世寧傳應詔陳邊備十策

臣章宗瀛按邊備十策

一曰嚴考覈以正士風二曰崇節儉以制財用三曰從權宜以足邊儲四曰立簡便以收鹽利五曰足兵食以選將校六曰閱軍實以修武備七曰廣收蓄以儲將材八曰立經制以禦外侮九曰重將權以責成效十曰周間謀以覘敵情見項篤壽所著今獻備遺
謹附考

胡世寧傳太平知州李濬數殺掠吏民

臣章宗瀛按

太平州明洪武初以土官李以忠歸附命其後世襲知州故名見土司傳謹附考

胡世寧傳條戍邊時所見險塞利害二十五事以上

臣章宗瀛按世寧所陳邊備二十五事用人二十事

明實錄俱未載原疏他書亦無可考其言保身講學二事則在嘉靖四年謹附考

胡世寧傳工匠趙奎等五十四人以中官請悉受職世

寧言賞過濫

臣章宗瀛按世寧所奏工匠受職過

濫在嘉靖五年四月見獻徵錄謹附識

胡世寧傳中官剛聰誣漕卒掠御服坐二千人

臣章

宗瀛按剛聰以織造至南京與運舟爭道遂起此獄

見明實錄謹附考

胡世寧傳世寧又上備邊三事

臣章宗瀛按世寧所

陳備邊三事明實錄未載他書亦無可考謹識

胡世寧傳陳九疇坐累廢

臣

章宗瀛按陳九疇先于

正德間以哈密事遭誣削籍至嘉靖初由按察使起

為僉都御史巡撫甘肅連破番兵絕哈密貢使會王
瓊與彭澤交惡修前隙使王邦奇等訟其開邊釁賴
世寧言得免見趙時春所撰傳史言坐累蓋指此謹
附考

李承勛傳且言山西潞城賊以四道兵討之不統于一
人故無功川貴芒部之設措置乖方再勝再叛宜命
伍文定深計毋專用兵

臣章宗瀛按是時土魯番

奪哈密小王子塞田州岑猛芒部沙保皆叛見明

實錄疏所言山西潞城川貴芒部蓋指此謹附識

范總傳條上駭政十要

臣

章宗瀛按上駭政十要明史

食貨志不載實錄亦未紀其疏經濟文輯今獻備遺

諸書皆無可考謹識

王邦瑞傳上勦寇十四策

臣

章宗瀛按勦寇十四策

獻徵錄僅載邦瑞弱寇時有此事為河南守所賞識
未臚其目他書亦無可考謹識

王邦瑞傳後條上興革六事

臣

章宗瀛按邦瑞所陳

興革六事安攘十二事經濟文錄及識大錄諸書皆
無可考明實錄亦未載原疏謹識

王邦瑞傳疏便宜數事

臣

章宗瀛按便宜數事明實

錄不載他書亦無可考謹識

明史卷一百九十九考證

欽定四庫全書

明史卷二百

大學士張廷玉等奉敕修

列傳第八十八

姚鏌

子沐

張嶺

伍文定

邢珣等

蔡天祐

胡張文璣

詹榮

劉源清

劉天和

楊守禮

張岳

李允簡

郭宗臯

趙時春

姚鎮字英之慈谿人弘治六年進士除禮部主事進員外郎擢廣西提學僉事立宣成書院延五經師以教士子桂人祀山魃卓旺鎮毀像俗遂變遷福建副使未幾改督學政正德九年擢貴州按察使十五年拜右副都御史巡撫延綏上邊務六事皆議行嘉靖元年濟農入涇陽鎮遣遊擊彭模出西路釋指揮卜雲於獄使副之夜半邀擊斬其二將乃遁璽書褒諭尋召為工部右侍

郎出督漕運改兵部左侍郎四年遷右都御史提督兩
廣軍務兼巡撫田州土官岑猛謀不軌鎮調永順保靖
兵使沈希夷與張經李璋張佑程鑒各統兵八萬分道
討而鎮與總兵官李麒等攻破定羅丹梁用希儀計結
猛婦翁岑璋使為內應大破之斬猛子邦彥璋誘殺猛
獻其首詔進鎮左都御史加太子少保任一子官諸將
進秩有差鎮請改設流官陳善後七事制可乃命參議
汪必東僉事申惠與參將張經以兵萬人鎮其地必東

惠移疾他駐猛黨盧蘇王受等詐言猛不死借交趾兵二十萬且至夷民信之蘇等薄城經突圍走城遂陷王受亦攻入思恩府巡按御史石金劾鎮失策罔上竝論前總督盛應期帝以鎮有功許便宜撫勦蘇受數求救鎮不許將大討之會廷議起王守仁督兩廣軍令鎮與同事鎮引疾乞罷許馳驛歸初廣東提學道魏校毀諸寺觀田數千畝盡入霍韜方獻夫諸家鎮至廣追還之官韜獻夫恨甚與張璁桂萼合排鎮謂大同當征而反

撫田州當撫而反征皆費宏謀國不臧釀成南北患時
宏雖去猶借鎮以排之也鎮既得請方侯代千夫長韋
貫徐伍攻復思思鎮上其狀詔先賞貫等而以撫勦事
宜俟守仁處置既而鎮奏辯石金前疏詆金阻撓養寇
金亦再疏詆鎮帝先入璁等言落鎮職閒任其後蘇受
復叛帝漸思鎮十三年三邊關摠制大學士費宏李時
同召對宏薦鎮時亦助之遂命以兵部尚書總制三邊
軍務未赴宏卒鎮辭帝不悅仍落職閒住鎮既罷薦者

至二十疏不用家居數年卒字洙字維東嘉靖二年殿試第一授翰林修撰爭大禮廷杖又議郊祀合祀不當輕易召修明倫大典懇辭不與累官侍讀學士

張嶺字時峻蕭山人成化二十三年進士弘治初修憲宗實錄命往蘇松諸府採軼事事竣授上饒知縣遷南京兵部主事就進刑部郎中正德初遷興化知府隆平侯張祐無子弟祿與族人爭襲訴於南京法司久不決復訴京師劉瑾方擅政遂削尚書樊瑩都御史高銓籍

嶺以郎承勘為民瑾敗起知南雄擢江西參政進右布政使舉治行卓異遷左寧王宸濠欲拓地廣其居嶺執不可大恚遣人餽之嶺發視則棗梨薑芥蓋隱語也未幾召為光祿卿以右副都御史巡撫保定諸府忤中官移疾歸世宗即位命以右都御史總督兩廣軍務廣西上思州賊黃鏐糾峒兵劫州縣嶺討禽之廣東新寧恩平賊蔡猛三等剽掠衆至數萬嶺合兵三萬餘人擊新寧諸賊破巢二百禽斬一萬四千餘人俘賊屬五千九

百餘人猛三等皆授首自嶺南用兵以寡勝衆未有若是後者提聞獎賚程鄉賊梁八尺等與福建上杭流賊相應遣都指揮李臯等會福建官兵夾擊俘斬五百餘人歸善李文積聚奸宄拒捕討之久弗克嶺遣參政徐度等勦之俘斬千餘人佛郎機國人別都盧剽刦滿刺加諸國復率其屬疎世利等擁五舟破巴西國遂入寇新會嶺遣將出海禽之獲其二舟賊乃遁尋召掌南京都察院事就改工部尚書六年大計京官拾遺被劾致

仕後數年卒

伍文定字時泰松滋人父琇貴州參議文定登弘治十二年進士有膂力便弓馬議論慷慨授常州推官精敏善決獄稱彊吏魏國公徐備與民爭田文定勘歸之民劉瑾入備重賄興大獄巡撫艾樸以下十四人悉被逮文定已選成都同知亦下詔獄斥為民瑾敗起補嘉興江西姚源賊王浩八等流劫浙江開化都御史俞諫檄文定與參將李隆都指揮江洪僉事儲珊討之軍華埠

而都指揮白弘與湖州知府黃衷別營馬金賊黨劉昌
三破執弘官軍大挫浩八突華埠洪文定擊敗之追及
於孔埠隆珊亦追至池淮破其巢進攻濠田洪以奇兵
深入中賊誘與指揮張琳等皆被執文定等殿後得還
賊亦遁歸江西諫等上文定忠勇狀詔所司獎勞擢河
南知府計禽賊張勇李文簡以才任治劇調吉安府計
平永豐及大帽山賊已佐巡撫王守仁平桶岡橫水宸
濠反吉安士民爭亡匿文定斬亡者一人衆乃定乃迎

守仁入城知府邢珣徐璉戴德孺等先後至共討賊文
定當大帥丙辰之戰身犯矢石火燎鬚不動賊平功最
擢江西按察使張忠許泰至南昌欲冒其功而守仁已
得宸濠赴浙江忠等失望大恨文定出謂遂縛之文定
罵曰吾不恤九族為國家平大賊何罪汝天子腹心屈
辱忠義為逆賊報讐法當斬忠益怒椎文定朴地文定
求解任不報尋遷廣東右布政使未赴而世宗嗣位上
忠等罪狀且曰曩忠泰與劉暉至江西忠自稱天子弟

暉稱天子兒泰稱威武副將軍與天子同僚折辱命吏
誣害良民需求萬端漁獵盈百萬致餓殍遍野盜賊縱
橫雖寸斬三人不足謝江西百姓今大憝江彬錢寧皆
已伏法三人實其黨與乞速正天誅用章國典又請發
宸濠貲財還之江西以資經費矜釋忠泰所陷無辜及
寧府宗人不預謀者以清冤獄帝竝嘉納之論功進右
副都御史提督操江嘉靖三年討獲海賊董效等二百
餘人賜敕獎勞尋謝病歸六年召拜兵部右侍郎其冬

擢右都御史代胡世寧掌院事雲南土酋安銓反敗參政黃昭道攻陷尋甸嵩明明年武定土酋鳳朝文亦反殺同知以下官與銓合兵圍雲南詔進文定兵部尚書兼前職提督雲南四川貴州湖廣軍討之以侍郎梁材督餉會芒部叛酋沙保子普奴為亂并以屬文定文定未至雲南銓等已為巡撫歐陽重所破遂移師征普奴左都御史李承勛極言川貴殘破不當用兵遂召還命提督京營文定至湖廣疏乞省祭歸已四川巡按御史

戴金復上言叛酋稱亂之初勢尚可撫而文定決意進兵一無顧惜飛芻輓糧糜數十萬及有詔罷師尚不肯已又極論土酋阿濟等罪軍民訛言幾復生變臣愚以為文定可罪也尚書方獻夫李承勛因詆文定好大喜功傷財動衆乃令致仕文定忠義自許遇事敢為不與時俯仰芒部之後憤小醜數亂欲為國伸威為議者旁撓廟堂專務姑息以故功不克就九年七月卒於家天啟初追謚忠襄邢珣當途人弘治六年進士正德初歷

官南京戶部郎中忤劉瑾除名瑾誅起南京工部遷贛
州知府招降劇盜滿總等授廬給田撫之甚厚後討他
盜多藉其力守仁征橫水桶岡珣常為軍鋒功最增二
秩宸濠反以重賞誘總總執其使送珣遂從珣共平宸
濠徐璉朝邑人文定同年進士由戶部郎中出為袁州
知府從討宸濠獲首功千餘事定珣璉遷江西右參政
世宗錄功各增秩二等嘉靖二年大計給事御史劾監
司不職者二十二人珣與焉吏部以軍功未酬請進

秩布政使致仕從之二人竟廢珣子埴嘗學於張璉嘉靖初登鄉薦璉貴顯屢欲援之辭不應授浦城知縣有徐浦者役公府埴一見異之令與子同學為娶妻後登第為給事中其家世世祀埴弟址進士歷御史終山東鹽運使以清操聞戴德孺臨海人弘治十八年進士歷工部員外郎監蕪湖稅有清名再遷臨江知府宸濠反遣使收府印德孺斬之與家人誓曰吾死守孤城脫有急若輩沉池中吾不負國也即日戒嚴旋與守仁共滅

宸濠以憂去世宗以德孺馭軍最整獨增三秩為雲南
右布政使舟次徐州覆水死後贈光祿寺卿予一子官
珣璉等倡義討賊月餘成大功當事者以嫉守仁故痛
裁抑之或賞或否又往往借考功法逐之去守仁之再
疏辭爵也為諸人訟曰宸濠變初起勢焰猖熾人心疑
懼退阻當時首從義師自伍文定邢珣徐璉戴德孺諸
人外又有知府陳槐曾興胡堯元等知縣劉源清馬津
傅南喬李美李楫及楊材王冕顧佖劉守緒王軾等鄉

官都御史王懋中編修鄒守益御史張鰲山伍希儒謝源等或摧鋒陷陣或遮邀伏擊或贊畫議論錄監經紀所謂同功一體者也帳下之士若聽選官雷濟已故義官蕭禹致仕縣丞龍光指揮高睿千戶王佐等或詐為兵檄以撓其進止壞其事機或偽書反間以離其心腹散其黨與今聞紀功文冊改造者多所刪削舉人冀元亨為臣勸說寧王毋為奸人構陷竟死獄中尤傷心慘目負之冥冥之中者夫宸濠積威凌劫雖在數千里外

無不震駭失措而況江西諸郡縣切近剝床觸目皆賊
兵隨處有賊黨非真有捐軀赴難之義勦力報主之忠
孰肯甘齏粉之禍從赤族之誅蹈必死之地以希萬一
難冀之功乎今臣獨崇封爵而此同事諸人者或賞不
行而并削其績或賞未及而罰已先行或虛受陞職之
名而因使退閑或冒蒙不忠之號而隨以廢斥非獨為
已斥諸權奸所誣構挫辱而已也羣憎衆嫉惟事指摘
搜羅以為快曾未見有鳴其不平伸其屈抑者臣竊痛

之奏入卒寢不行

蔡天祐字成之睢州人父晟濟南知府以廉惠聞天祐登弘治十八年進士改庶吉士授吏科給事中出為福建僉事歷山東副使分巡遼陽歲歉活飢民萬餘闢濱海圩田數萬頃民名之曰蔡公田累遷山西按察使嘉靖三年大同兵亂巡撫張文錦遇害詔曲赦亂卒改巡撫宣府都御史李鐸撫之鐸以母憂不至乃擢天祐右僉都御史巡撫大同天祐從數騎馳入城諭軍士獻首

惡衆心稍定會尚書金獻民總兵官杭雄出師甘肅道大同亂卒疑見討復鼓噪天祐懼急請再赦兵部言元惡不除無以警後請特遣大臣總督宣大軍務以制其變乃命戶部侍郎胡瓚偕都督魯綱統京軍三千人以往瓚等未發而進士李枝齋餉銀至亂卒曰此承密詔盡殺大同人為軍犒也夜中火起圍枝館出牒示之乃解尋復殺知縣王文昌圍代王府脅王奏乞赦王急攜二郡主走宣府巡按御史王官言亂平方囂大兵壓境

是趣之叛也請亟止禁軍容臣密圖乃命瓚駐兵宣府
頃之天祐奏總兵官桂勇已捕五十四人請止京軍勿
遣帝責以阻撓令必獲首惡郭鑑等既而瓚次陽和勇
天祐令千戶苗登禽斬鑑等十一人函首送瓚請班師
甫二日鑑登郭疤子復糾徐趨兒等夜殺勇家人又燬
苗登家瓚言非盡殲不可帝乃切讓天祐召勇還京以
故總兵朱振代之救瓚仍駐宣府居無何天祐捕戮徐
趨兒等瓚等遂班師明年正月侍郎李昆益春總兵官

馬永交章言庖子潛逃塞外必為後患帝將遣使勘會
璘還京言逃卒無足患帝乃罷勘官勿遣庖子復潛入
城焚振第明旦天祐閉城大索獲庖子及其黨三十四
人悉斬以徇盡宥脅從人心乃大定事聞賚銀幣已進
副都御史巡撫如故尋就進兵部右侍郎久之召還部
天祐以藩祿久缺又歲當繕邊垣用便宜增淮鹽引價
每引萬加銀五千被訐帝宥之至是御史李宗樞復追
論前事天祐因引疾去居二年奉詔起用未至京得疾

告歸卒年九十五天祐有才智兵變時左右皆賊耳目
幕府動靜悉知之大祐廣招星卜藝士往來軍中因具
得其情卒賴以成功在鎮七年威德大著父老為立安
輯祠胡瓚字伯珩永平人進士官終南京工部尚書張
文錦安邱人弘治十二年進士授戶部主事正德初為
劉瑾所陷逮繫詔獄斥為民瑾誅起故官再遷郎中督
稅陝西條上籌邊裕民十事遷安慶知府度寧王宸濠
必反與都指揮楊銳為禦備計宸濠果反浮江下文錦

等慮其攻南都令軍士登城詬之宸濠乃留攻卒不能克事具楊銳傳璽書褒美擢太僕少卿嘉靖元年拜右副都御史巡撫大同文錦性剛以拒賊得重名遂銳意振刷操切頗無序大同北四望平行寇至無可禦文錦曰寇犯宣府不能近鎮城者以葛谷白陽諸堡為外蔽也今城外即戰場何以示重議於城北九十里外增設五堡曰水口宣寧只河柳溝樺溝參將賈鑑督役嚴卒已怨及堡成欲徙鎮卒二千五百家戍之衆憚行請募

新丁僚吏咸以為言文錦怒曰如此則令不行矣鎮親兵先往孰敢後親兵素游惰有室聞當發大恐請以身往得分番又不聽嚴趣之鑑承風杖其隊長諸邊卒自甘州五衛殺巡撫許銘朝廷處之輕頗無忌至是卒郭鑑柳忠等乘衆憤遂倡亂殺賈鑑裂其屍走出塞屯焦山墩文錦恐與外寇連令副將時陳等招之入城即索治首亂者郭鑑等大懼復聚為亂焚大同府門入行都司縱獄囚又焚都御史府門文錦踰垣走匿博野王府

第亂卒欲燔王宮王懼出文錦郭鑑等殺之亦裂其屍
遂焚鎮守總兵公署出故總兵朱振於獄脅為帥時嘉
靖三年八月也事聞帝命侍郎李昆赦亂卒昆為文錦
請卹典不報久之文錦父政訟其子守安慶功禮部為
之請終不許文錦妻李氏復上疏哀請帝怒命執齋疏
者治之副都御史陳洪謨言文錦僨事朝廷戮之可也
假手士卒傳之四方損國威不小復降旨詰責自是廷
臣不敢言萬厯中始贈右都御史天啟初追謚忠愍

詹榮字仁甫山海衛人嘉靖五年進士授戶部主事歷
郎中督餉大同值兵變殺總兵官李瑾總督劉源清率
師圍城久不下榮素有智畧善應變叛卒掠城中無犯
榮者外圍益急榮密約都指揮紀振游擊戴濂鎮撫王
寧同盟討賊察叛卒馬昇楊麟無逆志乃陽令寧持官
民狀詣源清所為叛卒乞原而陰以榮謀告請宥昇麟
死畀三千金俾募死士自効會源清已罷巡撫樊繼祖
許之昇麟遂結心腹禽首惡黃鎮等九人戮之榮乃開

城門延繼祖入復捕斬二十六人錄功擢光祿寺少卿
再遷大常寺少卿二十二年以右僉都御史巡撫甘肅
魯默特貢使留甘州者九十餘人總兵官楊信驅以禦
寇死十之一榮言彼以好來而用之鋒鏑失遠人心且
示中國弱詔奪信官檣死者送之歸番人感悅踰年以
大同巡撫趙錦與總兵官周尚文不相能詔榮與錦易
任諱達數萬騎入掠榮與尚文破之黑山陽進右副都
御史寇復大舉犯中路參將張鳳等陣歿榮與尚文及

總督翁萬達嚴兵備陽和而遣騎邀擊多所殺傷寇乃引去代府奉國將軍充灼行剽掠奏奪其祿充灼等結小王子入寇謀據大同榮告尚文捕得皆伏辜榮以大同無險乃築東路邊牆百三十八里堡七墩臺百五十四又以守邊當積粟而近邊弘賜諸堡三十一所延亘五百餘里關治之皆膏腴田可數十萬頃乃奏請召軍佃作復其租徭移大同一歲市馬費市牛賦之秋冬則聚而遏寇帝立從焉寇入犯與尚文破之彌陀山斬一

部長榮先以靖亂功進兵部右侍郎又以繕邊破敵累被獎賚召還理部事進左尚書趙廷瑞罷榮署部務奏行秋防十事已而翁萬達入為尚書遭母喪榮復當署部務辭疾乞休帝怒奪職閒住越二年卒當榮之撫大同也萬達為總督尚文為總兵三人皆有才畧寇數入不能得志自後代者不能任寇無歲不入闡邊人益思榮等明年諸達薄京師萬達榮皆已去論者謂二人在寇未必至此萬厯中榮孫延為順天通判上書訟榮功

贈工部尚書予卹如制劉源清字汝澄東平人正德九年進士授進賢知縣宸濠反源清積薪環室命家人曰事急火吾家一僕逸手又以徇縣中諸惡少與賊通者悉杖殺之宸濠妃弟姜伯歸上饒募兵源清邀戮之賊檄至立斬其使會餘干知縣馬津龍津驛丞孫天祐亦起兵拒賊賊七殿下者奪運舟於龍津天祐與戰殺數人賊黨募兵過龍津天祐追殺之焚其舟姜氏家衆西下亦為天祐所遏禽七十餘人賊兵不敢經湖東以窺

兩浙者三人力也賊平源清徵為御史嘉靖改元津亦入為御史津滁州人終福建副使源清尋遷大理丞謝病歸六年夏以右僉都御史巡撫宣府滴水崖賊郭春據城叛稱王源清遣卒捕之為所覺副總兵劉淵令曰止禽元惡以旗遶城而呼其黨皆散春等自刎死總兵官邵永虐下源清劾罷之進副都御史十二年以邊警遷兵部左侍郎總制宣大山西保定諸鎮軍務大同總兵官李瑾浚天城左孤店濠四十里趣工急卒王福勝

等焚殺瑾因焚巡撫潘倣署倣奏瑾激變帝命源清同
總兵卻永討之源清榜令解散而榜言五堡變處之過
寬五堡遺孽大懼師次陽和倣等密捕亂卒杖死十餘
人繫賊首王保等七十餘人以獻請旋師源清懲昔胡
瓚事不欲已以囚屬御史蘇祐因妄言前總兵朱振失
職首亂且多引無辜源清遣參將趙綱入城大索城中
訛言城且屠亂卒遂鼓噪殺千戶張欽會僉事孫允中
自源清所至諭源清意撫慰之始定振前為亂卒所擁

實不反諸源清自明不能白發憤自殺永兵至城下大掠五堡遺孽遂盡反迎戰殺遊擊曹安官軍攻據四關晝夜圍擊亂卒出前參將黃鎮等於獄奉為帥死守倣與鎮國將軍俊樞等登城止毋攻俊樞出見永請緩兵皆不聽允中縋城出言將士妄殺狀源清叱曰汝為賊游說耶欲囚之允中不敢歸源清因多設邏卒遏王府及有司軍民章疏而請益師至五萬帝命侍郎錢如京都督江桓統京軍八千以往已忽悟罷弗遣專責源清

永討賊倣駝疏言將士妄殺激變速斂師亂可已源清亦詆倣媚賊張孚敬主源清侍郎顧鼎臣黃綰言用兵謬帝不能決城圍久大困毀王府及諸解舍供饗兵部復下安撫令源清亦樹幟招降叛卒稍稍自投首惡黃鎮等亦分日出見乞通樵採路永許諾翌日採薪者出永悉執之城中人益懼亂卒復叛勾外寇為助永遇之大敗而遁叛卒遂引寇十餘騎入城指代府曰以此為納延居納延者華言大人也城中人聞之皆巷哭明日

外寇攻東南二關叛卒與犄角官軍殊死戰互有殺傷
寇知叛卒不足賴倒戈擊之大詬而去是時寇遊騎南
掠至朔應源清請募九邊兵增總制官禦之已得一意
攻城帝不許源清乃百道攻穴城為毒烟熏死者相籍
復請壅水灌之帝大不懌奪其職閒住以兵部侍郎張
璘代之璘未至郎中詹榮等已悉捕首惡黃綰勘功罪
言源清永實罪魁具劾其婪賄不貲狀兵科曾忬等言
宸濠亂源清有保障功當蒙八議之貸帝怒下忬等詔

獄逮源清治之獄久不決綰憂去乃減死斤為民諳達
薄京師即家起之未赴而卒隆慶初贈兵部尚書

劉天和字養和麻城人正德三年進士授南京禮部主
事劉瑾點御史十八人改他曹二十四人補之天和與
焉出按陝西鎮守中官廖堂奉詔辦食御物於蘭州天
和謂非所部辭不往堂奏天和拒命詔逮之部民哭送
者萬人錮詔獄久不釋吏部尚書楊一清疏救法司奏
當贖杖還職中旨謫金壇丞刑部主事孫繼芳抗章救

不報屢遷湖州知府多惠政嘉靖初擢山西提學副使
累遷南京太常少卿以右僉都御史督甘肅屯政請以
肅州丁壯及山陝流民於近邊耕牧且推行於諸邊尋
奏當興革者十事田利大興改撫陝西請撤鎮守中官
及罷為民患者三十餘事帝皆從之洮岷番四十二族
蠢動天和誅不順命者又討平湖店大盜及漢中妖賊
就進右副都御史母憂服闋以故官總理河道黃河南
徙歷濟徐皆旁溢天和疏汴河自朱仙鎮至沛飛雲橋

殺其下流疏山東七十二泉自鳧尼諸山達南旺湖濬其下流役夫二萬不三月訖工加工部右侍郎故事河南八府歲役民河中不赴役者人出銀三兩天和因歲饑請盡蠲旁河受役者課遠河未役者半之詔可十五年改兵部左侍郎總制三邊軍務兵車皆雙輪用二十人遇險即困又行遲不適於用天和請倣前總督秦紘隻輪車上置砲槍斧戟廂前樹後覘牌左右虎盾連二車可蔽三四十人一人輓之推且翼者各二人戰則護

騎士其中敵遠則施火器稍近發弓矢又近乃出短兵敵走則騎兵追復製隨車小帳令士不露宿又毒弩矢修邊牆濠塹皆從之濟農十萬衆屯賀蘭山後遣別部寇涼州副將王輔逐奪其燾寇莊浪總兵官姜瓖屢敗之進天和右都御史寇復大集兵將入犯天和策寇囑西有備必東密檄延綏副將白爵宵行與參將吳瑛合寇果東入黑河墩遇爵伏兵大創而去既又入蒺藜川爵尾擊之寇多死尋入寇家澗張家塔為爵瑛所敗犯

寧夏者總兵官王效復破之帝大喜進天和左都御史
濟農犯河西天和禦却之進兵部尚書寇將入平虜賊
天和伏兵花馬池寇戰不勝走河上遇伏兵多死於水
濟農乘虛寇固原剽掠且饜會淫潦弓矢盡膠無鬪志
而諸將多畏縮天和斬指揮二人召故總兵周尚文令
立功會陝西總兵官魏時角寇至黑水苑尚文盡銳夾
擊殺濟農子小十王寇退寧夏巡撫楊守禮總兵官任
傑等復邀擊敗之鐵柱泉斬獲共四百四十餘級論功

加天和太子太保廕一子錦衣千戶前後賚銀幣十數
遷南京戶部尚書召為兵部尚書督團營言官論天和
衰老遂乞休歸家居三年卒贈少保諡莊襄天和初舉
進士劉瑾欲與敎宗姓謝不往晚年內召陶仲文以刺
迎稱戚屬天和返其刺曰悞矣吾中外姻連無是人仲
文恚其罷官有力焉

楊守禮字秉節蒲州人正德六年進士除戶部主事嘉
靖初屢遷湖廣僉事以計禽公安賊魁坐事謫敎州通

判累遷右副都御史巡撫四川與副將何卿平諸番亂
賚銀幣初守禮貶敘州為僉事張文奎所辱至是文奎
遷四川參議恐守禮修隙先以所撫事奏詔二人俱解
職歸守禮才器敏達中外以為能居家未久工部尚書
秦金等會薦起河南參政再遷右副都御史巡撫寧夏
寇犯固原為總督劉天和所敗欲自寧夏去守禮與總
兵任傑等邀敗之會天和召還進守禮右都御史總督
軍務代之錄前功進兵部尚書總兵官李義楊信連却

濟農三賜璽書銀幣尋上疏乞休帝惡其避難降俸二級其秋寇三萬騎抵綏德游擊張鵬却之總兵官吳英等追至塞外東路參將周文兵亦至夾擊敗之巡按御史殷學言寇入內地五百里請治諸將罪部議延綏游兵俱調宣大寇方避實擊虛而我能以寡勝衆宜錄其功乃加守禮太子少保學謫外守禮尋以憂去諡達薄都城廷臣首以守禮荐詔趣上道寇退止不行久之卒張岳字維喬惠安人自幼好學以大儒自期登正德十

一年進士授行人武宗寢疾豹房請令大臣侍從臺諫
輪直起居視藥餌防意外變不報與同官諫南巡杖關
下謫南京國子學正世宗嗣位復故官遷右司副母老
乞便養改南京武選員外郎歷主客郎中方議大禘禮
張璁求始祖所自出者實之禮官皆唯唯岳言於尚書
李時曰不如爲皇初祖位毋實以人時大喜告璁璁不
謂然以初議上帝竟令題皇初祖主如岳言璁銜之出
爲廣西提學僉事行部柳州軍缺餉大譁城閉五日岳

令守城啟門召詰譁者予餉去尋以計禽首惡置之理
入賀改提學江西不謝璉璉黜廣西選貢七人謫岳廣
東鹽課提舉遷廉州知府督民墾棄地教以桔槔運水
廉民多盜珠池岳居四年未嘗入一珠帝使使往安南
詰莫登庸殺主岳言於總督張經曰莫氏篡黎可無勘
而知也使往受謾詞辱國請留使者毋前經不可知欽
州林希元上書請決討莫氏岳貽書止之復條上不可
討六事為書貽執政曰據邊民報黎調襲封無嗣以兄

子諲為子陳暲作亂，嗣遇害。暲篡未幾，國人擁立諲暲。奔諒山，諲立七年，為莫登庸所逼，出居升華。登庸立，諲幼弟應而相之，卒弑應，自立國，分為三黎。在南莫居中，陳在西北，後諒山亦為登庸有。陳遂絕，而黎所居即古日南地，與占城隣，限大海。登庸不能踰之，南故兩存。近登庸又以交州付其孫福海，而自營海東府地，都齋居之。蓋安南諸府，惟海東地最大，即所謂王山郡也。此賊負篡逆名，常鍊兵備我。又時揚言求入貢，邊人以非故。

王也弗敢聞愚以為彼內亂未嘗有所侵犯可且置之待其亂定乃貢若必用兵勝負利鈍非岳所敢知執政得書不能決已毛伯溫來視師張經一以軍事委岳又以翁萬達才進二人於伯溫岳與伯溫語數日伯溫曰交事屬君矣許登庸如岳議會岳遷浙江提學副使又遷參政伯溫馳奏留之乃改廣東參政分守海北登庸降加岳俸一級賜銀幣尋以征瓊州叛黎功加俸及賜如之塞上多事言官薦岳邊才伯溫言岳可南翁萬達

欽定四庫全書

明史
卷二百

五

可北也遂擢岳右僉都御史撫治鄖陽旋移撫江西進右副都御史總督兩廣軍務兼巡撫討破廣東封川獠蘇公樂等進兵部右侍郎平廣西馬平諸縣獠賊先後俘斬四千招撫二萬餘人誅賊魁韋金田等增俸一級召為刑部右侍郎以御史徐南金言命留任連山賊李金與賀縣賊倪仲亮等出沒衡永郴桂積三十年不能平岳大合兵討禽之蒞鎮四年巨寇悉平召拜兵部左侍郎湖廣間有山曰蜡爾諸苗居之東屬鎮溪千戶所

算子坪長官司隸湖廣西屬銅仁平頭二長官司隸貴

州北接四川酉陽廣袤數百里諸苗數反官兵不能制

侍郎萬鏜征之四年不克乃授其魁龍許保冠帶湖苗

暫息而貴苗反如故鏜班師龍許保及其黨吳黑苗復

亂貴州巡撫李義壯告警乃命岳總督湖廣貴州四川

軍務討之進右都御史義壯持鏜議欲撫岳劾其阻兵

罷之先義壯撫貴州者僉都御史王學益與鏜附嚴嵩

主撫議數從中撓岳岳持益堅許保襲執印江知縣徐

欽定四庫全書

明史
卷二百

五

文伯及石阡推官鄧本忠以去岳坐停俸乃使總兵官

沈希儀參將石邦憲等分道進躬入銅仁督之先後斬

賊魁五十三人獨許保黑苗跳不獲岳以捷聞言貴苗

漸平湖苗聽撫請遣土兵歸農朝議許之未幾酉陽宣

慰冉元嗾許保黑苗突思州刦執知府李允簡邦憲兵

邀奪允簡還允簡竟死嵩父子故憾岳欲逮治之徐階

持不可乃奪右都御史以兵部侍郎督師邦憲等旋破

賊岳搜山箐餘賊獻思州印及許保湖廣兵亦破禽首

惡李通海等岳以黑苗未獲不敢報功已而冉元謀露
岳發其奸元賄嚴世蕃責岳絕苗黨邦憲竟得黑苗以
獻苗患乃息岳卒於沅州喪歸沅人迎哭者不絕已敘
功復右都御史贈太子少保謚襄惠岳博覽工文章經
術湛深不喜王守仁學以程朱為宗李允簡融縣人由
舉人起家以郡境多寇遣孥歸獨與孫炳文居祖孫皆
被執許保挾以求厚贖允簡則傳語邦憲令亟進兵在
賊中自投高崖下賊拽出棄之途思人舁還至清浪衛

而卒詔贈貴州副使賜祭葬官一子

郭宗臯字君弼福山人嘉靖八年進士選庶吉士尋詔與選者皆改除得刑部主事擢御史十二年十月星隕如雨未幾哀冲太子薨大同兵亂宗臯勸帝惇崇寬厚察納忠言勿專以嚴明為治帝大怒下詔獄杖四十釋之歷按蘇松順天行部乘馬不御肩輿會廷推保定巡撫劉夔還理院事宗臯論夔嘗薦大學士李時子諂媚無行不任風紀坐奪俸兩月尋出為雁門兵備副使轉

陝西參政遷大理少卿二十三年十月寇入萬全右衛
抵廣昌列營四十里順天巡撫朱方下獄擢宗臯右僉
都御史代之寇已去宗臯言密雲最要害宜宿重兵乞
敕馬蘭太平燕河三屯歲發千人以五月赴密雲有警
則總兵官自將赴援居庸白楊地要兵弱遇警必侍部
奏不能及事請預擬借調之法令建昌三屯軍平時則
協助密雲遇警則移駐居庸俱報可久之宗臯聞敵騎
四十萬欲分道入奏調京營山東河南兵為援已竟無

實坐奪俸一年故事京營歲發五軍詣薊鎮防秋宗臯
請罷三軍以其犒軍銀充本鎮募兵費又請發修邊餘
銀增築燕河營古北口帝疑有侵冒令罷歸聽勘既而
事得白起故官巡撫大同與宣府巡撫李仁易鎮尋進
兵部右侍郎總督宣大山西軍務諳達三萬騎犯萬全
左衛總兵官陳鳳副總兵林椿與戰鷄兒嶺殺傷相當
宗臯坐奪俸明年再犯大同總兵官張達及椿皆戰死
宗臯與巡撫陳耀坐奪俸給事中唐禹追論死事狀因

言全軍悉陷乃數十年未有大衄帝乃逮宗臯及燿
各杖一百燿遂死宗臯戍陝西靖虜衛隆慶改元從戍
所起刑部右侍郎改兵部協理戎政旋進南京右都御
史就改兵部尚書參贊機務給事中莊國禎劾宗臯衰
庸宗臯亦自以年老求去詔許之萬厯中再存問歲給
廩隸十六年宗臯年九十又遣行人存問是年卒贈太
子太保謚康介

趙時春字景仁平涼人幼與羣兒嬉輒列旂幟部勒如

兵法年十四舉於鄉踰四年為嘉靖五年會試第一選庶吉士以張璁言改官得戶部主事尋轉兵部九年七月上疏曰陛下以災變求言已旬月大小臣工率浮詞而謾蓋自靈寶知縣言河清受賞都御史汪紘繼進甘露令副都御史徐讚訓導范仲斌進瑞麥指揮張楫進嘉禾鉞及御史楊東又進鹽華禮部尚書李時再請表賀仲斌等不足道鉞讚司風紀時典三禮乃罔上欺君壞風傷政帝責其妄言且令獻諫言善策時春惶恐引

咎未對帝趣之於是時春上言當今之務最大者有四
最急者有三最大者曰崇治本君之喜怒賞罰所自出
勿以逆心事為可怒則賞罰大公而天下治曰信號令
無信一人之言必參諸公論毋徇一時之近必稽之永
遠苟利十而害一則利不必興功百而費半則功不必
舉如是而天下享安靜之福矣曰廣延訪宜倣古人輪
對及我朝宣召之制使大臣臺諫侍從各得敷納殿陛
間羣吏則以其職事召問之曰勵廉恥大臣宜待以禮

取大節略小過臺諫言是者用之非者寬容之庶臣工
自愛不敢不勵其最急者曰惜人才凡得罪諸臣其才
不當棄其過或可原宜霽然發命名還故秩且因南郊
禮成除謫戍之罪與之更始曰固邊圉敗軍之律宜嚴
臨陣而退者裨將得以戮士卒大將得以戮裨將總制
官得以戮大將則人心震悚而所向用命曰正治教請
復古冠婚喪祭之禮絕醮祭禱祀之術凡佛老之徒有
假引符籙依託經懺幻化黃白飛昇遐景以冒寵祿者

即賜遣斥則正道修明而民志定帝覽之益怒下詔獄
掠治黜為民久之選東宮官屬起翰林編修兼司經局
校書帝有疾時春與羅洪先唐順之疏請東宮御殿受
百官正旦朝賀帝大怒復黜為民京師被寇朝議以時
春知兵起兵部主事贊理京營務統民兵訓練大將軍
仇鸞倡馬市時春憤曰此秦檜續耳身為大將而效市
僧可乎忤鸞為所構幾重得罪稍僉山東僉事進副使
三十二年擢僉都御史巡撫山西時春慷慨負奇氣善

騎射慨冠縱橫將帥不任戰數謂人使吾領選卒五千
諳達卹福不足平也作禦寇論論戰守甚悉既秉節鉞
益思以武功自奮其年九月寇入神池利民諸堡時春
率馬步兵往禦之至廣武諸將畢會謀報寇騎二千餘
去兩舍時春探甲欲馳大將李洙固止之時春大言曰
賊知吾來必遁緩追即不及遂策馬前及於大蟲嶺伏
兵四起敗績倉皇投一墩守卒絕之上乃得免洙軍竟
覆被論解官聽調時春喜談兵至是一戰而敗然當是

時將帥率避寇不擊為督撫者安居堅城遙領軍事無躬搏寇者時春功雖不就天下皆壯其氣時春讀書善強記文章豪肆與唐順之王慎中齊名詩伉浪自喜類其為人

贊曰姚鏌等封疆宣其擘畫軍務暢其機謀勲績咸有可紀伍文定從王守仁平宸濠之難厥功最懋趙時春將畧自命一出軌躋夫危事而易言之固知兵者所弗取乎

明史卷二百

欽定四庫全書

明史卷二百考證

姚鏌傳遷福建副使

臣章宗瀛按鏌任福建副使時

嘗定計討平大帽山賊劉龍等見明翟鑒所撰墓志
傳未載謹附考

姚鏌傳巡撫延綏上邊務六事

臣章宗瀛按姚鏌所

陳邊六事明實錄不載獻徵錄今獻備遺諸書亦無
可考謹識

姚鎔傳陳善後七事

臣

章宗瀛按鎔所陳善後事宜

明實錄但言改流官增兵戍而已未臚舉其目他書

亦無可考謹識

張嶺傳嶺以郎承勘為民

臣

章宗瀛按獻徵錄載嶺

官興化時郡人戴大賓弱冠及第劉瑾欲以姪女奪其舊聘囑嶺主之嶺拒不從遂為所惡借張祐事落其職傳未詳載謹附考

張嶺傳召為光祿卿

臣

章宗瀛按嶺之內擢由宸濠

忌其不為己用行賄陰使之見明費宏所撰行狀傳
未之載謹識

蔡天祐傳歷山東副使

臣

章宗瀛按天祐官山東時

曾平濟南龍山及淄川盜見獻徵錄謹附考

蔡天祐傳張文錦督稅陝西上籌邊裕民十事

臣章

宗瀛按文錦所陳籌邊裕民十事明實錄未載他書

亦無可考謹識

詹榮傳督餉大同值兵變

臣

章宗瀛按大同兵變在

嘉靖十二年十月蓋張文錦之後至是凡再亂見明實錄謹附考

劉天和傳尋奏當興革者十事田利大興

臣章宗瀛

按天和所言當革者五曰搭剋曰占役曰湖場曰派撥曰侵漁當興者五曰開墾曰墩堡曰牛種曰治水曰屯兵見明王世貞所撰墓志謹附考

張岳傳入賀

臣

章宗瀛按岳之入賀在嘉靖十一年

以世宗壽節也見識大錄傳未詳叙謹附考

張岳傳移撫江西

臣

章宗瀛按岳撫江西時夏言治

生塚議費于廣信七縣縣措千金岳改為百金及嚴
嵩賜第名其閭曰延恩命官為經理岳批牘與千金
吏請益增五百金而貽書嵩諷以戒侈此二事皆見
識大錄傳未載謹識

明史卷二百考證